

Kayëta ixinëm ir Piyer in Lilaya in

Akayëta aņo ex akinëm and yëgwën babi Piyer bamara band okëreceņ band lapar bani gë bëlaŵënel bënëgwêš baņ. Në end osëyali or fudac orebën eņ, bërëŵak bëranjëm wëlandëra baņi do bani wëkarënd në end ine ko legëanaxënegund Axwën an ga re baxo mëne gogo ko bakaw. Piyer aŷëgwën këbi mëne Axwën an axo dëgënanand na. Barikan abuņa ko buņand xali ala kala exo nëngwët ola orexëm ol do exo teb beņeņëanax beņ. Er ex gër akayëta in:

End or šenene do gë end bëlaŵënel eņ: 1.1-21.

End ekwëyëta ed osëyali or onëgwêš eņ: 2.1-22.

En ošën or omakaw ond Axwën eņ: 3.1-18.

Ecëmar el

¹ Wëno Simon Piyer, ariyenin do parëxanda ir Yesu Kërisët an, këņun yëgwënëlinde kayëta ijo wën bër gë ekwëta ed xëbënek ang edebi ak bën, paš gë or šenene or Kaxanu do gë Afexën Yesu Kërisët ol.

² Oyekax ol do gë obetak ol bašërël ex gër ndewën ga nang kënebi ako Kaxanu do gë Yesu, Axwën arebi an.

End oxëreceņ eņ

³ Kaxanu ayël yël këbo gë panga indexëm in dëņ dek bebër kë yana ene dıyaxënende ang ex

ola or Kaxanu ak mēŋ ar w̄acēgu kēbo gē enjaran endexēm eŋ do gē ekēbēnaxik endexēm an.

⁴ Paβ gē enjaran eŋo do gē ekēbēnaxik eŋo, yēl kēbo Kaxanu beβēr beya baβo bēn, en koraxēn en cana osēmbak or gēr ngwēn ol or oñandi oñēŋenax ok do en cotaxēn ola or Kaxanu ol.

⁵ Awa nē end eŋo dēŋ, kemēnayin gē obal osēm en bašaxēn gēr ekwēta edewēn owerēgweran ol, do gēr owerēgweran, onangēran ol.

⁶ Bašin gēr onangēran, egi ed gē anjus el do gēr egi ed gē anjus el, ekemēnal el. Bašin gēr ekemēna, epēb ed Kaxanu el.

⁷ Bēte bašin gēr epēb ed Kaxanu, ebalēr ed gēr aminēmēra and oxēreceŋ el do gēr ebalēr ed gēr aminēmēra and oxēreceŋ, aŋana aŋ.

⁸ Enimin, angēmēne benjekax beŋo ahi hik gēr ola orewēn do ex ñēmb, an ñana na en bayind gē bandixa banjekax kēm, an gi na gē odēwērēwēn kēm, gēr enang ed Yesu Kērisēt, Axwēn arebi el.

⁹ Barikan ar šanēk beŋo an, axo watērand na aye, xali hi ko ang ašiwēk fo. Axwēya xwēya ko angunētan and bamena band baxo rind and ganēka aŋ.

¹⁰ Bēte bēmaŋe, kemēnayindēn en balēkēnali nēmēc oŋac or w̄ac kēŋun do gē eyata ed yata kēŋun Kaxanu el. Angēmēne mondako kēn rind, din an pokēr na.

¹¹ Ata Kaxanu mondako kēŋun fērētēnaxēn ebēt eñangax, en dīlaxēn gēr owun or din ir din or Yesu Kērisēt, mēŋ ar ex Axwēn arebi do Afexēn arebi an.

12 Mëñ ex bête, wëno din këmunn ÿana mun kwitanënd beño ga nang kën anëka do lëkaya kën ðal ir şot kën in.

13 Yëla këme aye yek, nand bayi këme gër eman eño na, mun nëngëtënd gë bend këmunn xwitanënd beño.

14 Gayikwa Yesu Kërisët, Axwën arebi an, anangën nangën ke mëne gogo këme şës.

15 Barikan gë oxor oram ol këme ri mun tebëtanaxën er këñun ÿana eñun kwitanënd, nand ex yo, beño ðek.

End enjaran eñ

16 Enimin, biyi ex otede od watëk ola oxëbëanaxik or Yesu Kërisët, Axwën arebi ol gë bangës bandebi baño dëñ. Anangën nangën këmunn panga indexëm in do gë omakaw on-dexëm oñ, xarak ax gi ex na gë bendacan bend xamën këni bela.

17 Gayikwa Faba Kaxanu yël këño or gapak ol do gë enjaran añ yatir wëli bax oniŵ orexëm ol gër enjaran ekëbëanaxik eño ga kë re: «Ajo ex Asëñiŵën ar pëlot gër yomb iram an, wëno monëngan ke nënganënd endexëm eñ*.»

18 Biyi dëñ wël bax oniŵ olo ga wëliwëk gër orën and ebami gë Axwën Yesu Kërisët yañ gër etënd emënëk añ.

19 Biyi cëñ, er reya këni bëlawënel in, er mokwëta nëmëc ex. Awa wën aÿap ÿapëk eñun balënd end eyeyan elo eñ. Er hik ang lambo ir kë ðoband gër ecamëðan fo xali ex canayaw

* 1:17 1.17 Maco 17.5

angoŕben aŋ do emal ed oxeya el ex ŋoŕband gër owëkw orewën.

²⁰ Damana beŋo dek, anang nang kën mëne gër Oñëgw Omënëk, eyeyan ed alawënel ed ex anjëlän and ala, ax gi ex na.

²¹ Gayikwa, alawënel abax yeyanënd ex na ang baxo yëland ak. Angoc Amënëk aŋ babi wäsinënd bëlawënel bën gër onden ondebën end Kaxanu end këni reya eŋ.

2

End bësäyali bënëgwëš eŋ

¹ Akarëk aŋ, bëlawënel bënëgwëš hi bax na gër bulunda ir Isërayel. Bëte mondako fo këni xani bërëmar mërëxand irewën eni gi bësäyali bënëgwëš, eni dïlaliw benëgwëš bend kë nambelind do eno yaxëtand Axwën an, mëŋ ar racët këbi an. Ata bëjo mocala këni šaland enemi ed bërëxadët el.

² Bëranjëm këbi sëf gër aniyän atëmbak andebën, do bëšëxen bën në endebën këni ŷana eni cirënd fëña ir däl in.

³ Bësäyali bëjo, ga ðan këni napul in kënun ŷana enun yifand gë bend këni yerëtënd bën fo beŋ, enun dëxëlëxaxënënd. Barikan kiti indebën in elod anëka fo wël bax, do enemi edebën el ax gi ex na mocëni!

⁴ Omeleka od wëndëra bax ok, Kaxanu aŋo kaŷënan bana endebën eŋ. Alap lap këbi gër ambëxw atiwx do xap këbi gë ogweyele-gweyele gër acamëdan ang gë gweyele-gweyele fo eni cënixën kiti in.

⁵ Bête Kaxanu alaw̃ law̃ babi gë oÿëm ol, bela bësëmbak bër ebax akarëk bën, angwën and baxo femërand Nowe end aniyan and ŝenene aŋ. Barikan fexën këbi Nowe do gë bela bëcongëbëxi bësëxe.

⁶ Bête Kaxanu anëp nëp babi bër gër Sodom do gë Gomor bën and bëlën ko bangol baŋo aŋ. Mondako ri baxo eni nangaxën dek bësëmbak bën mène mëŋ axiti ko xitind.

⁷ Barikan aracët racët baŋo Lot, mëŋ ar ŝenene ar bax xoÿërand, në end eñac end bëwëŝik bëjo eŋ.

⁸ Gayikwa ar ŝenene ar bax liyand gër bangol band Sodom do gë Gomor ajo, key yo key baŋo yambënënd gër emëkw ed ŝenene edexëm në end eñëŋenax end baxo watënd do baxo wëlënd eŋ.

⁹ Awa eŋo këbo wăsinënd mène Axwën an axam xam ko edacët ed bër ŝenene gër ocëmu el. Barikan afeni këbi fenind bësëmbak bën ebi nëpaxën yatir kiti.

¹⁰ Adofa anëp këbi nëp bër këbi ÿetëÿetënd edi ed bemuyaraxik bën, bër kë xaŝërënd gër edi ed oñandi od eman do këni yepënënd or gapak or Axwën bën.

Bësëyali bënëgweŝ bëjo, axwëta xwëta këni ogaf odebën ok do arafëna këni rafënannd mène ani yëdand na ecir ed bangoc bacaraxik band gër orën el.

¹¹ Xarak omeleka od xuca këbi ojaŵ do gë panga ok dëŋ anëbi nëpënd na, ani kwëŝand na gër lëngw ir Axwën Kaxanu enëbi cir.

¹² Barikan bën ari këni rind ang bër gë onden

këm fo, ang oŵacar fo, oŵacar or eñaş or xwël kënëbi do enëbi dfaŵ xali eni bër ol. Aşir këni şirënd er bayik ani nang ex na in.

¹³ Osëmbak orebën olo axana këni xana ang acosa fo. Monëngan këbi nënganënd eyëlaya ed gër oñandi od eman ogës od bela dek el. Oşëfën orewën ex and këni yow gër ed kën fedër ñambëran aŋ, opëna odewën ok këni buyarënënd.

¹⁴ Bangës bandebën baŋ yer orekar fo ex, do din abi pedënd na eñëŋenax eŋ. Ayifa kënëbi yifand bela bër sitarak bën, monjëlaya yëlaya këni gër aŋana and kodî. Ata bëjo obaş or xata këbi fo exëni.

¹⁵ Ga seb këni fëña ir şenene in, nambëraxën këni ga sêf këni fëña ir Balam, asëñiw ar Bosor in, mëŋ ar ñan bax acosa and exo dixën osëmbak an.

¹⁶ Barikan fali, mène ngëŋ emacar, yeyan bax ang ala fo do rexëra baŋo në end amena andexëm, alawënel ar şenëkët baŋo an, xali xwëşan këŋo.

¹⁷ Bësëyali bënëgweş bëjo, ang bandu band gë men këm fo exëni; ang ebed ed şapërelik ekoc fo exëni. Ata bën şëni këbi acamëdan aŋ.

¹⁸ Gayikwa añebëta këni ñebëtand eni deya bend gë ofëcak këm, bend gë ndafënan itëm. Mondako këni rind enëbi yifaxën gë oñandi oñacaxik od eman ok bela bër şanëguk gë ojaŵ fo gër otaxan od bër kë liyand gër enambëran bën.

¹⁹ Bela bëjo abeya beya banëbi mène aniyan and yaya kënëbi yël, xarak bën dëŋ okadëp od

beber kë nemind exëni. Gayikwa ala kala xadëp ir er wëña këno hi ko.

²⁰ Enimin, angëmëne aseþ seb këni bemuyaraxik bend gër ngwën ro beþ paþ gë enang ed nang këno Yesu Kërisët, Axwën do Afexën arebi el do eni bakan beþo xali ebi bëña gašëxe, awa nëmëc këni nëxena ang nëxena bani añanar ak.

²¹ Er fecadox këreni nang dona aniyan and šenene aþ, gë eni nang aye dëþ, do eni mašan epoy apela amënek and sëyali këneþi aþ.

²² Awa bën anëka hi këbi eyeyan ed ðal ed orenik ed kë rend: «Laþët iþ anëka bakan ko exo yamb er wis baxo in[☆].» Bëte: «Ambëxwëbëxw anëm and buyi bano ecede-ecede aþ, anëka rëgwaya ko gašëxe gër egway.»

3

End omakaw ond Axwën eþ

¹ Wën bëmaþe bënd ke balënd mbaþ bëþo, kayëta ixinëm in këmun yëgwënëlinde. Gër okayëta oki oko, këmun xwitanënd bend nang kën aye beþ, en nëngëtaxën gër onden on-dewën.

² Ata kën ýana en kwitand bend reya këni, akarëk aþ, bëlawënel bëwënek beþ do gë apela and oparëxanda odewën aþ, apela and ex and ar ex Axwën do Afexën arebi aþ.

³ Nangin mëne ðamana beþo ðek, gër bakey þapelatar, bela bër kë sëfënd oñandi oñëþenax do këni sanënd mbaþ kë šanayaw na.

☆ 2:22 2.22 Andorenik 26.11

⁴ Do are këni ÿana eni dend: «Feye ngwa exo ar beya bax mëne abaka ko bakaw an? Gayikwa elod ga rašëra këbi gër ecës bëxarëk bën, beÿ bën ang ebax elod and ÿanak ngwën ak bayik[☆].»

⁵ Enimin, bëjo mama dëŋ këni xwëyand mëne akarëk aŋ, paß gë eyeyan ed Kaxanu el hixënëk orën ol do gë ebar el, do ebar el šanëguk gër men do xangëk.

⁶ Ngwën ind angwën aŋo in ſilipa bax kwëc gër amen.

⁷ Xarak Kaxanu, gë eyeyan elo fo re ko ašor ko šor orën ol do gë ebar ed gërëgako el yatir kiti ind këbi nemin bela bësämbak in.

⁸ Barikan emat ex end ax gi ex na mokwëya eŋ, wën bëmaÿe bënd ke balënd mbaŋ bëŋo: Gër Axwën, akey amat gwër fo ex gë bëniy wëli do bëniy wëli gwër fo ex gë akey amat.

⁹ Axwën an axo dëgënan na gër eŋata ed er beya ko, ang këni yëland bërëmar ak. Ga këŋun bujanënd ko šënin wën dëk en nëngwët dëk ola orewën ol gayik aŋo ñandi ex na ala exo nemi.

¹⁰ Barikan akey and Axwën aŋ, ang arek fo kë yow. Yatijo, orën ol ašapër kë šapër gë ongëbër oŋigëanaxik. Bëbër ex gër orën gë xodux bën, ex pëtëra. Ata ebar el, gë bëbërexëm bën ex wati ang ex ak.

¹¹ Awa gayikako bëbijo dëk afët kë fët, wën nëkonin ba mondake ÿapëk en dïyand! Gë ola owënëk do gë epëb ed Kaxanu

☆ 3:4 3.4 Esayi 5.19

¹² ŷapëk en cënind do en ñandënënd akey and Kaxanu aŋ, akey and kë fëtëra beber ex gër orën gë xodux aŋ.

¹³ Xarak biyi ašëni këne šëni nde beber beya këbo Kaxanu bën: orën oxašax do gë ebar ekašax, gër ed kë xëñ or šenene ol. Ata biyi eŋo këne šëninde.

¹⁴ Wën bëmaŷe bënd ke balënd mbaŋ bëŋo, awa gër ošën olo, kemënayin eŋun təkati Axwën an bëwënëk, bër gë etëmbak këm, gër aketëxeta.

¹⁵ Pënileŋun mëne ebuŋan ed buŋan këŋun Axwën arebi el ex apexa andewën aŋ, ang ŷëgwën këŋun bëte Pol, mëŋ imaŷe ind këbo balënd mbaŋ iŋo, gë orenik or šot ko ol.

¹⁶ Mondako ko ŷëgwënd Pol gër dek okayëta odexëm and ko yeyanënd beŋo aŋ. Barikan bengas exëna bend lakëk epëni. Ata bër sitarak gër onden do ani piri ex na gër onangëran bën, anëngwët këni nëngwëtënd er kë rend in. Ado mondako fo këni rind gë Oñëgw Omënëk ocëxe ok do këni neminayand gë andebën aŋ dëŋ.

¹⁷ Awa gayikako gana gana fo nang kën beŋo, wën bëmaŷe bënd ke balënd mbaŋ bëŋo, perënayin de këdi kënëbi sëfa bela bëwëšik bëjo gër enambëran edebën do en teb ekemëna el.

¹⁸ Barikan piriyin gër oyekax do gër enang ed Yesu Kërisët, Axwën do Afexën arebi el. Mëŋ xwënëk enjaran eŋ, gërëgako do xali din ir din! Amen!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: Oniyan

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 29 Apr 2025 from source
files dated 29 Apr 2025

8b7902f3-5e35-5b89-86b2-c6da1be458b9